

粵  
海  
關  
志

粵海關志卷八

稅則一

臣謹按周官太宰以九賦斂財賄有邦中之賦  
有四郊之賦有邦甸之賦有家削之賦有邦縣  
之賦有邦都之賦有關市之賦有山澤之賦說  
者謂載師所言園廛二十而一卽邦中之賦也  
近郊十一遠郊二十而三卽四郊之賦也甸稍  
縣都皆無過十二卽邦甸家削縣都之賦也漆  
林之征二十而五卽山澤之賦也獨不言關市

者蓋關市所稅同於山澤皆較他賦爲重然先王之制不必有因而無革

聖人有作制國之用皆本

子惠黎元之隱所積而推故衡較前代不特坊場牙契板帳月椿諸法爲今世之所無卽崇本抑末亦必損之又損而常額之外復

特加優貸如米豆則免稅珠寶則免稅貢船漁船則免稅其取民也有制而

施惠也無窮此固成周之治所不逮者也今輯稅則一

門先之以事例繼以正稅比例估值而以各口稅貨歷年征數各口旺月與夫耗折平碼征存撥解歸公例終焉

凡征稅關各頒其則鏤而樹於市令商自註於冊而輸課遂給以單稽其隱匿者起行者重則罪之輕則罰之凡貢物皆征其稅惟外藩之貢物則不征凡免稅者覈其實而驗放焉

凡輸稅者衣物之屬以疋計以身計以卷計以箇計以件計以箇計以副計以條計以斤計以

十雙百雙十頂百頂計食物用物及雜貨之屬  
以斤計以簍計以包計以箇計以擔計以塊計  
以件計以張計以鏹計以埕計以石計以十套  
百套十把百把計牲畜之屬以口計以價計其  
貨有包者不除包皮每百斤作九十斤科算  
凡雜貨如裝載磚瓦石灰蜆殼缸鏹稻殼柴灰  
草料豬牛雜毛之屬其船俱補半料

凡澳門夷船係本省發往外洋者照本省洋船  
例科征其外洋抵澳之西洋船照外洋本條科

征

凡商船回澳止征船稅丈其貨物而籍記之貨入於夷室俟華商懋遷出澳始納稅

凡外洋販到貨物有爲則例所未載者該監督於滿任後比例定則報部

凡肉菓枳梗炭烏木臭泥臭運肉之屬免其科稅醃蒜苗瓜菜神元寶之屬亦免科稅不類此者不得牽混援引

凡一切洋貨舊任監督已經科給有紅單者新

任不得重征

康熙二十三年九卿等議覆戶科給事中孫蕙奏言海洋貿易宜設立專官收稅應如所請得旨海洋貿易創收稅課若不定例恐爲商賈累當照關差例差部院賢能司官前往酌定則例嗣經郎中伊爾格圖酌定開海征稅則例奏請給與各關定例款項於橋道渡口征收稅課奉

聖諭向令開海貿易謂於閩粵邊海民生有益若此二省民用充阜財貨流通各省俱有裨益且出海非貧

民所能富商大賈貿遷有無薄征其稅不致累民今若照奉差郎中伊爾格圖所奏給與各關定例款項於橋道渡口等處概行征收何以異於原無稅課之地反增設一關科斂乎此事恐致擾民爾等傳諭九卿詹事科道會議具奏戶部等衙門遵

諭議覆福建廣東新設關差止將海上出入船載貿易貨物征收其海口內橋津地方貿易船車等物停其抽分并將各關征稅則例給發監督酌量增減定例從之

康熙二十四年戶部劄稱本部准禮部咨題內  
開查定例內開凡外國進貢船隻不過三等語  
今奉

聖諭外國進貢船隻所帶貨物一概收稅於柔遠之意  
未符等因應將外國進貢定數船三隻內船上  
所攜帶貨物停其收稅其餘私來貿易者准其  
貿易貿易商人部臣照例收稅等因會議具題  
奉

旨依議

康熙二十八年戶部奉

聖諭近聞江浙閩廣四省海關於大洋興販商船遵照  
則例征收稅課原未累民但將沿海地方採捕魚蝦  
及貿易小船概行征稅小民不便今應作何征收俾  
商民均益著九卿詹事科道會同確議以聞尋經議  
奏奉

旨採捕魚蝦船隻及民間日用之物併餬口貿易俱免  
其收稅

雍正十三年七月戶部奏言粵海關征收貨物

則例於雍正六年經前署撫臣將湖絲木香等款不符緣由查明具題經臣部議覆照現行征收各款分別詳載刊榜曉示務使商民知有定規吏胥無從滋弊等因具題奉

旨依議欽遵行文在案今廣東副都統兼管粵海關稅務毛克明等奏稱則例凡稅則及免例不開者以雜貨算查雜貨每百斤稅止二錢價值相去懸殊一概算作雜貨未免稅額過輕是以歷任遵照引比征收之條設立比例簿冊第未經奏

明又不咨部恐輕重有差碍難畫一遵守理合繕寫比冊一本伏乞

敕部覈覆等語

臣

部將該關比例稅冊與原額則例較

對均有多寡不一但歷任引比征收商賈樂於輸將應如該副都統毛克明等所奏將節年征收比例一體載入例冊刊榜曉示庶征收稅課得有遵守而商民咸知奉行於

國課實有裨益而關政之弊竇自可清除再該副都統奏稱每年外洋所到貨物比例未經開載

者按其價值估計輸稅難以預擬俟期滿奏銷另行咨部等語亦應如所奏俟該關一年期滿將收過外洋貨物比例定擬送部查覈并令該監督毋致征多報少以滋侵隱等弊可也等因奉

旨依議

乾隆二年覆准各省米穀稅例九江粵海蕪湖鳳陽清江廠北新天津浙海等關並廣西之桂林平樂梧州潯州富州賀懷集等府縣皆稱征

收船料未便遽行更張但米穀爲民食所資與  
百貨不同若不分別豐歉概行征收恐歉歲省  
分致增米價有妨民食嗣後舊征米稅船料各  
關除豐登之年遵照舊例按則征收外倘地方  
偶遇旱潦其附近省分各關口令該督撫卽將  
被災情形具奏請

旨寬免凡米穀船一到卽便放行俟該地方秋收成熟  
方准按照舊例征收

乾隆七年八月二十日戶部會議言內閣鈔出

協理山東道事廣東道監察御史李清芳奏江蘇布政使管理許關安寧奏稱許關米穀麥豆雜糧等項俱計石征收至船料從不收取今准部議船料一體輪納等因現在按照各項船隻長短深淺濶狹覈其受載多寡逐一分晰報部等語臣思關稅一件關係民生查天下各關空船征料及貨船并征者甚少其餘不過就貨稅銀並無征收船料而戶部議內云各關空船既係征料船料自應一體輪納是戶部據數處之

關以懸揣天下之關也安寧奏內稱滄關則例本不收取船料甚明而云現在按照各項船隻長短深淺廣狹逐一分晰定議是本不收取船料之關今將添設船料稅額也萬一天下各關依此例辦理是不問何項船隻有貨無貨凡過關者俱當上稅矣我

皇上至聖至明念切民依將過關米豆盡行免稅澤至渥也今若如此辦理是免商人米豆之稅以惠民而收窮民本不納稅之船銀以充用臣雖至

愚必知其不可也且民間有船其裝載糧食者十之一其不裝載糧食者十之九卽以江浙之蘇松常鎮杭嘉湖等府言之人煙湊集其船隻之多大小不下數十萬艘百姓賴以資生者何啻數百萬人其間不裝糧食以往來者居其大半今若一概征而稅之則自杭之北新關以至淮安等處千里之內當納船料四五處矣小民以船爲生父母妻子俱在其中千里往還所得無幾其船大者賃價不過六七兩小者三四兩

其間行家埠頭抽剝殆盡終歲勤勤涉歷風濤  
比之行商賈客尤爲可念臣謹細繹

聖諭內各關征收則例不一有征商稅者有征船料者  
有商稅船料並征者今旣蠲米豆之稅其船料  
一項若不分晰明確著有規條恐致混淆滋弊  
是以

勅部詳查妥議原以米稅旣免恐稅料並征之關混淆  
滋弊也若將本不征收船料之關議令更張收  
稅殊與

諭旨不符臣愚以爲凡從前稅船之關仍舊輸納船稅  
不得以米豆藉口其本無征輸船料者不應議  
及添設船稅則

聖主之恩膏下究而萬民實受其福矣等因於乾隆七  
年七月初十日奉

硃批九卿議奏欽此臣等正在覈議間又據協理陝西  
道事山東監察御史沈廷芳奏稱臣閱邸鈔御  
史李清芳奏米稅船料一摺殊未詳悉伏查米  
豆蠲稅一事荷

聖主斷自宸衷舉由宋迄明五百年掊斂之陋政一旦而廓清之恤商便民利存萬世凡司計管權諸臣自當仰體

皇上愛民賤貨之心務崇寬大畧去苛刻今部議乃恐船戶串通分船裝載或有偷漏行令詳查夫

聖主意在廣施恩澤故於米稅之重者旣盡予蠲除豈於船料偷漏之區區尙宜錙銖計較况米商挾貲侔利邀

恩免稅萬姓歡呼已深感戴若雇船載米多裝一船卽

多一船之雇費船到關卽行開放聽其所之使  
米商易於往來則米價自能平減今又議令將  
免過數目造冊報部則凡有米船抵關其石數  
稅銀之多寡關吏仍須細加盤詰得賄者或卽  
行先放無賄者或托故留難不特守候稽遲更  
開吏胥需索今米船旣行免稅則每年所免額  
稅之數公家卽不必與聞若年滿造冊徒滋累  
商無裨善政必致

恩波不能遍及請將各關米船之船料亦永遠蠲除等

因乾隆七年七月奉

旨九卿一併議奏欽此欽遵於本月十七日鈔出到部  
該<sub>臣</sub>等伏查乾隆七年四月

聖諭米豆各項向因商人販賤鬻貴是以照則征輸第  
思小民朝饔夕飧惟穀是賴非他貨物可比今特降  
諭旨將直省各關口所有經征米豆應輸額稅悉行  
寬免永著爲例至各關征收則例不一有征商稅者  
有征船料者有商稅船料並征者今旣蠲免米稅其  
船料一項若不分晰明確著爲規條恐致混淆滋弊

應如何辦理之處著交該部詳查妥議具奏欽此經  
遵經戶部議令該關監督將向例征收空船料銀者  
遇有裝載米糧過關其應納料銀應照依空船  
料銀之數納料如本係空船及按年抽單納課  
者仍照舊例征收但船隻料銀各關俱係收納  
何計石征收之關獨不收納料稅或係料稅卽  
在計石征收之內則例未經開載查各關空船  
既係征料是船料自應一體輸納應令該關監  
督詳細查明定議報部等因具奏奉

硃批依議欽此通行各督撫監督在案今該御史李清芳奏稱澣關本不收取船料而云現在按照各項船隻分晰定議是將添設船料稅額萬一天下各關俱依此辦理不問何項船隻有貨無貨過關俱當上稅是將本不征收船料之關議令更張收稅殊與

諭旨不符請將從前稅船之關仍舊輸納船稅其本無征輸船料者不應添設船稅又據御史沈廷芳奏稱天津蕪湖等關向納船料今請一體蠲除

等語臣等正在詳加會議於乾隆七年八月奉  
聖諭朕愛養黎元特沛殊恩將關榷米豆等稅悉行蠲  
免以爲充裕民食之計但船料一項議論不一現發  
九卿會議尙未覆奏朕思此事並無難辦之處向征  
船料者應照例征收向不征船料者豈可因免米豆  
之稅而轉加征船料著該部卽速行文各關知之欽  
此欽遵仰見我

皇上加惠商民恩施周洽今船料一項各關監督欽遵  
諭旨將舊有船料者照例征收向無船料者不得因免

米豆稅銀轉加船料務俾商販流通米糧價直  
平減以仰副

皇仁應將該御史李清芳所奏船料不應添設并御史  
沈廷芳所奏船料一體蠲免之處均毋庸再議  
至該御史沈廷芳奏稱米稅既除米船到關卽  
行開放聽其所之今議令將免過數目造冊報  
部則凡有米船抵關其石數稅銀之多寡關吏  
仍須盤詰不特守候稽遲更開吏胥需索年滿  
造冊徒滋累商應請永停等語查各關征收米

糧稅銀送部稽考簿內有將米糧字樣指出者  
亦有籠統開造並無米數者而各關年滿奏報  
戶部例係將上年所收之數比較覈題今若不  
將免過數目造報恐管關之員或藉免稅之名  
任意虧缺無從查覈是以議令將免過數目年  
滿造冊報部原爲稽考覈題起見且權關之設  
自古職司稽察若云米船到關即可任其所之  
不必稽查恐有藉稱米船暗帶違禁等物希圖  
影射偷越者在商人或有自愛資本不必盡出

於此而舵工水手人等奸良不一惟利是圖將  
來此等情弊勢所必至則過關查驗放行止以  
便商非以累商而查驗之時即可將米糧數目  
彙冊報部亦無累商之處今該御史奏請停止  
造冊應俟一年造報之後各關免過米糧稅銀  
已有成數則以後皆可約畧而知再行停其造  
報庶爲妥協又該御史沈廷芳奏稱淮安宿遷  
兩關近聞米船到彼關吏以部覆未定仍欲征  
收以致米商裹足不前准宿許墅旣皆若此奉

行失實恐他關亦約畧相等語查各關欽奉  
聖諭卽應將蠲免米豆稅銀出示曉諭商民今現據江  
南督臣將奏明各關停征米稅原摺送部及據  
潯墅關監督安寧奏稱准到部文卽將到關之  
米穀豆麥雜糧等船欽奉

恩旨免其輸納奏明在案是該御史所奏關吏以部覆  
未定仍欲征收以致米商裹足不前之處事屬  
風聞原無確見應毋庸議

乾隆十三年四月初八日戶部奏言內閣鈔出

兩廣總督策楞奏稱粵海關規例戶部於火燬  
文卷案內查取經前撫臣準泰咨送并將歷年  
更正遺漏各條粘籤聲明准部議覆以海關規  
例係乾隆元年奏明刊刻未便據咨遽議等因  
臣於接管關務之後復通行各口逐加細覈現  
據造送前來臣查粵海關規例從前查造之時  
因祇就各書役開報陋規卽爲刊刻送部並未  
與現收條款逐細覈明是以有將現征之條遺  
漏未經入冊者有將口岸平色籠統開列而不

爲分晰聲明者有減免在前仍行造入冊內者  
有續經奉文寬免而未及刪除者其中並有實  
在重複科征歷任查出減免者海關與督撫衙  
門俱歷有案卷可查實無別項情弊除查照各  
口現收條款與原刊之冊逐一覈對添註並另  
繕清冊咨送戶部外臣謹遵照部議繕摺奏明  
等因乾隆十三年二月二十四日奉

硃批該部議奏欽此欽遵於本月二十八日鈔出到部  
臣等查得粵海關向征外洋商船稅正課之外

另有船規分頭擔頭耗羨等項銀兩從前係官吏私收入已自雍正四年至七年前任巡撫楊文乾等節次報出歸公遞年奏解迨至乾隆元年前任監督鄭五賽等將征收條款自行奏明刊刻送部備查在案嗣因臣部貴州司案卷於乾隆十年九月內被焚行令補造送部旋據調任廣東巡撫準泰咨稱規例條款碎繁從前查報歸公一時考覈難周未能悉行刊入亦有一二因時制宜應酌量覈定者歷任監督隨時咨

明督撫更正今將現行各條并節任相沿更正緣由一併登註例冊等因臣部以該關規例係乾隆元年奏明刊刻送部未便據咨遽議咨覆該撫各在案今據該督策楞將粵海關原刊規例逐一添註另繕清冊奏請更正前來臣部將該關原刊例冊并添註更正條款清冊逐一詳細較對有從前查報歸公時遺漏而今補載者有平色籠統而今分晰者有銀數訛刻而今改正者有重複開列而今刪除者並有奏明

特旨減免而今聲明者該督既稱從前祇就書役開報  
卽爲刊刻送部實無別樣情弊自應更正以垂  
永遠遵守又冊內裁減鈔規擔銀八條歷任管  
關官員旣因擾累商民隨時咨明督撫裁減商  
民稱便均應如該督策楞所奏准其更正仍將  
更正條款刊榜曉示畫一征收毋許不法吏胥  
格外需索致累商民至冊稱紫泥口載貨每船  
規銀二錢內給水手盤費銀三分餘銀一錢七  
分歸公崖州口每船家人巡役各收車轎銀七

八錢水手把港錢二三百文向給家人巡役水  
手不入歸公冊報等語查前項規銀既經奏明  
列入例冊理應征收解部何得以爲家人盤費  
之用且查該關經費冊內家人等役已給有工  
食銀兩未便又將前項規銀重複給發應令該  
督將前項規銀仍照舊例征收解部再查規例  
銀兩從前旣已奏明歸公卽屬正課無異如有  
一二因地制宜應行更正之處理宜隨更隨報  
庶臣部有所稽查今除前項更正條款旣據該

督策楞聲明海關與督撫衙門俱有案卷可查  
實無別樣情弊應毋庸議外嗣後倘有更正之  
款令將更正緣由聲明報部則部中有所稽查  
而內外辦理均得畫一矣等因奉

旨知道了

乾隆二十二年戶部奏言據閩浙總督喀爾吉  
善兩廣總督楊應琚會奏稱外洋紅毛等國番  
船向經粵海關稽查征稅投牙貿易少至浙江  
是以浙海關稅則畧而不詳今乾隆二十年二

十一年外洋番船連來船隻收餉定海運貨寧  
波交易往來視同熟境先因該番商偶一至浙  
非比久常一切科稅諸事無不逾格從寬茲既  
捨粵就浙若不將粵海浙海兩關則例互相比  
較更定章程則道路之遠近無別貨殖之低昂  
不分必致奸牙蠹吏私扣暗加不特課額有虧  
亦與番商無補悉心會商將粵海關征收外洋  
貨稅則例及比例規例并出口貨物估價各冊  
逐一查覈除比例緣物類繁多稅則未能備載

以此例彼原無軒輊其規例係從前吏胥家人私收陋例嗣經查出歸公以上二項浙關循照征收毋庸另議增減惟正稅一項未便仍照粵海關科則征收蓋向由浙江赴粵之貨今就浙置買稅餉腳費俱各輕減而外洋進口之貨分發蘇杭亦屬便易該番商既比在粵貿易獲利加多則浙關稅則未便概行減少擬將浙關征收外洋船隻正稅科則照依粵關則例酌議加增其中有貨物產自粵東原無規避韶贛等關

稅課者悉仍舊則概不議加正稅之外仍照加  
一征耗其粵海關估價一項係將該商出口貨  
物估計價值按貨本一兩征收銀四分九釐名  
爲分頭先年亦係官吏家人私收入己之項迨  
後清出歸公今應循照辦理但估價原係按照  
貨物時值估計科銀未便意爲約畧如湖絲茶  
葉磁器等各種貨物現就浙江時值多與粵海  
關原例不符似應按照時值增估更定其中有  
時價相符者仍循其舊至船隻樑頭之丈尺及

貨物進口出口之擔頭悉照粵關則例征收不  
准減免其浙江上年咨請改征飯食輕減之案  
俟更定則例咨部查銷等語查設關收鈔裕課  
必須通商而剔蠹除奸柔遠尤宜經久外洋紅  
毛等國番船前因偶一至浙並非經年往來貿  
易是以浙關原定科則從寬今該督喀爾吉善  
等既以番船捨粵就浙若不更定章程必致奸  
牙蠹吏私扣暗加課額有虧與商無補悉心會  
商將循例征收概不議加及應行加征增估各

款分晰聲明開單會奏除循照舊例科征之比  
例規例正稅火耗估計各項既無增減毋庸置  
議外其奏請更定之正稅估價二項臣部按單  
逐加確覈亦屬因地制宜之道應分繕清單恭  
呈

御覽俟

命下之日行文各監督遵照辦理仍將更定條款刊榜  
曉示畫一征收毋許不法胥役格外需索致累  
番商再查單開珊瑚珠科稅一條臣部檢查粵

例並無此款係按何例覈稅之處并令浙督查  
明報部可也等因奉

旨依議此摺內所稱若不更定章程必致私扣暗加課  
額有虧與商無補等語尙未深悉更定稅額本意向  
來洋船俱由廣東收口經粵海關稽察征稅其浙省  
之寧波不過偶然一至近年奸牙勾串漁利洋船至  
寧波者甚多將來番船雲集留住日久將又成一粵  
省之澳門矣於海疆重地民風土俗均有關係是以  
更定章程視粵稍重則洋商無所利而不來以示限

制意並不在增稅也將此明白曉諭督撫知之

乾隆二十四年十二月二十二日總督李侍堯

監督尤拔世會奏言竊臣李侍堯前奏請除外

洋夷船規禮名色以杜混弊以協體制事欽奉

聖諭查審監督李永標一案檢閱粵海關則例內開外

洋番船進口自官禮銀起至書吏家人通事頭

役止共規禮火足開艙押船丈量貼寫小包等

名色共三十條又放關出口書吏家人等共驗

艙放關領牌押船貼寫小包等名色共三十八

條頭緒棼如實屬冗雜臣等查直省各關從無  
關禮名色載入則例獨粵海關存有此名者因  
從前此等陋規皆係官吏私收入己自雍正四  
年起管關巡撫及監督等節年奏報歸公遂同  
正稅列入例冊循行已久自當仍舊征收但存  
此規禮名色在口人役難免藉端需索情弊應  
請

皇上敕交新任監督尤拔世會同督撫將此前項規禮  
等名目一概刪除合併覈算改刊每船進口歸

公銀若干俾歸一定既與體制相協蠹役奸胥亦不能藉端弊混矣抑臣等更有請者外洋夷船既經更定則本港洋船及別省至粵船隻一切規禮名色均請刊改歸公二字以臻畫一再則例內開載瑣碎各口參差不齊易啟在口人役高下其手之弊亦請

敕交監督會同督撫詳加覈定以垂永久所有外洋夷船進口出口規禮名目謹照則例繕具清單恭呈

御覽是否有當伏乞

皇上聖鑒等因乾隆二十四年九月二十二日奉到

硃批李侍堯會同尤拔世詳議具奏欽此茲臣尤拔世

已於十月初二日抵任臣李侍堯遵卽會同逐

加確覈伏查粵海關凡外洋本港商船貨物出

入向則除按照則例科征正稅船鈔之外另有

官吏家人通事巡役人等規禮以及分頭擔頭

等項銀兩從前原係私收入已從雍正四年至

七年前任管關巡撫楊文乾等節次奏報歸公

以後原係彙併征解而則例冊內仍照從前開報各項名色分別臚列誠於體制未協茲遵彙併覈算統作進口出口歸公銀各若干將一切規禮火足開艙驗艙放關押船貼寫小包等名色與各條內凡有字義未協之處悉行刪除更正至丈量領牌原與收稅章程無碍止須除去書役家人收取字樣毋庸過爲更易轉致牽混難明其分頭擔頭等項向有分列數條者今統作一條造報至於各口規則其中間有因船隻

貨物大小輕重不同或滿載半載之別是以從前所開征收銀錢有多寡不等字樣既無一定確數難免書役家人高下其手征多報少茲查明歷年收稅冊檔分別等次開造以杜弊竇以上更正各條均與原收規則毫無增減又查省城大關以及虎門潮州雷州瓊州各口向有書役家人收作飯食舟車等費亦備列則例冊內似有未協但往來稽查港口以及看守洋船押同起貨盤費食用在所必需勢難裁汰茲將前

項銀錢統作歸公造報另列應支條款送部覈  
定按年支銷奏報俱屬有餘而無不足俟覆覈  
奏准刊刻頒發各口永遠遵守繁冗旣刪名目  
亦正洵足清稅款而杜弊端部議從之

乾隆二十八年總督蘇昌奏言粵海關向來除  
征收正額稅鈔并加一火耗外另有私收規禮  
火足驗船開船押船丈量貼寫放關領牌小包  
以及分頭擔頭等項陋規銀兩每年不下六七  
萬兩從前原係丁役私收入己自雍正四年起

歷任管關巡撫監督節次報出歸公一并列入  
例冊征收除支給通關人役火足經費外餘銀  
列入雜羨盈餘項下解部迨乾隆九年復經前  
任管關廣州將軍臣策楞將粵海關原定經費  
逐一覈定應支款項數目并查出另有并兌平  
餘漏稅罰料及吏役應給火足截曠銀兩三項  
每年約銀二千兩議請另款收貯以充公用於  
乾隆九年七月內奏明經部覆准在案此一切  
規禮擔頭等項陋規久經歸公支銷報解之原

委也又海關衙門設有承舍等七班人役聽候差遣并備各稅口換班之用共二百餘名向無額編工食惟藉商船貨物進出每百斤收擔銀一分一釐零至一分三釐不等每年約收銀三四千兩每名歲得十餘兩或一二十兩不等以爲工食養贍之資亦經前管關將軍臣策楞於乾隆九年十一月內奏請照舊留給欽奉

俞允又各項陋規雖經節次查出歸公其種種名色仍刊入例冊征收與體制未協乾隆二十五年復

經前任督

臣

李侍堯等奏請悉行刪除改作歸

公字樣并查得省城大關虎門及潮州雷州瓊  
州各口岸向有家人書役查船收取飯食舟車  
銀自一二錢以至一兩錢自一二十文以至五  
六百文不等向或以一半歸公一半賞給或全  
數給與載入例冊征收查係必須之項亦請改  
作歸公名目征收另列支銷條項造報經部覆  
准亦在案此又近年逐漸釐正歸公之情節也  
查以上各項陋規俱歷經奏明改作歸公條款

刊入例冊征收所收之銀或支給經費或解部  
充公均應照舊存留辦理至現在大小口岸除  
征收正稅火耗之外惟統收歸公銀兩以資公  
用其餘一切紛繁條款悉行刪除實無額外私  
征及賄縱浮收等弊並無應革之款所有查明  
粵海關陋規久經歸公應照舊存留辦理情由  
謹查明奏覆奉

硃批該部知道

謹按此案先一年兩江總督尹繼善奏請將

各關陋規酌量應留應革以資辦公經部將  
本關規禮擔銀併平罰料截曠以及舟車飯  
費等六項議留

乾隆三十二年四月戶部咨稱據巡撫兼理臨

清關事務崔

名映

咨稱查得臨清戶關稅則從前

原按鈔貫覈算每鈔一貫征收銀三釐一毫七  
絲三忽耗銀加一嗣於乾隆二十九年本院奏  
明將鈔貫更定銀數按款覈征不特商稅每單  
原有奇零尾數卽所征糧石空重人載船料等

項每款每票亦各有零星長尾是以向來商人逐日親填并年滿奏銷分送部科紅單稽考等簿俱將毫絲以下尾數逐一開寫造送今大部議奏各省征解鹽課關稅等項其中條目雖多瑣碎不免有零星撒數但每款各有成總原不難刪繁就簡應令嗣後於總數之下遵照

諭旨歸減等語則關稅一項是否於征收商稅石頭以

及空重人載船料每款每單每票各將奇零尾數歸減其分送部科單票簿籍亦按每條歸減

造送抑或止於年滿奏銷之時將征收錢糧總數之下遇有零星長尾在五毫以上者作爲一釐歸併造報其不及五毫悉行減除原奉部咨未經分晰指明恐致辦理舛錯再查戶關原額之外每年向有應解銅斤水脚銀七千六百九十二兩三錢一分二釐五毫嗣後奏銷之時是否將五毫之數仍存其舊抑或統歸三釐奏報擬合咨部示覆等因前來查本部覆奏刪減銀米等項零星尾數原摺內開凡銀數統以釐爲

斷其不及一釐之零數應請折中歸減在五毫  
以上者作爲一釐歸併造報不及五毫者悉行  
刪除查各州縣衛經征錢糧向例每戶每歲各  
給易知由單單內前列細款後開總數便民輸  
納嗣後應征錢糧統令於由單總數之下遇有  
奇零遵照歸減其單內前列細款仍存其舊以  
符賦役全書魚鱗冊籍之款至如征解關稅等  
項條目雖多瑣碎不免有零星數但每款各  
有成總原不難刪繁就簡應令嗣後於總數之

下一體遵照歸減等因在案是關稅一項自應  
遵照原奏於征收稅商石頭以及空重人載船  
料每款照舊填註細款其每單每票總數下各  
將奇零尾數歸減至造送部科單票簿籍及奏  
銷錢糧卽按每單每票歸減總數報銷仍將單  
票一并分送以便查覈再各項總數既經按照  
原奏歸減則臨清戶關應解銅斤水脚款內尾  
零二釐五毫亦應統歸三釐奏報以昭畫一相  
應一併咨覆該撫并通行各管關督撫監督遵

照辦理仍出示曉諭毋許吏役藉端需索

乾隆三十三年七月二十一日戶部奏言

臣等

查得本年五月內經內務府奏准通行嗣後各處官辦

貢物俱令各關照數查驗按例稅課等因在案今據淮安關監督方體浴奏稱各省所辦

貢物之外每年有官辦銅錫鉛斤紙張顏料木植毛竹等項經過該關向例俱係除官物外查有餘貨按數科稅今

貢物更定新例此項官物是否仍照舊例辦理等語查各處所辦

貢物內務府議令一體查驗納稅者原因押送人役借

貢品名色夾帶私貨希圖影射漏稅起見至各省一切官辦物件如該監督所稱銅錫鉛斤紙張顏料木植等類以此類推不可枚舉但額支帑項採買運解之物若令一體納稅其稅銀仍須在正項銀內開銷既動官帑以辦官物復支官

項以輸官稅一出一納間挹彼注茲實屬徒滋  
煩瑣自應悉令循照舊例辦理其官物之外帶  
有餘貨仍應按數科稅至奏稱向例銅鉛過關  
將所帶添秤餘銅應稅數目填給印花統歸崇  
文門報稅所有各處

貢物可否仿照此例辦理仍將過關月日報內務  
府查考等語查官辦銅斤各解員備帶添秤餘  
銅例准納稅售賣但其實在餘剩若干必俟交  
局足數後方有定準過關時無憑懸擬覈數是

以止照各關應納稅則填給印花以便俟有餘  
銅確數彙總科稅至各處

貢物均經開寫

貢單有數可稽原與餘銅之預無確數者不同其  
經過各關自應遵照內務府原奏按單逐件查  
驗依則收稅以杜偷漏仍報明內務府查覈未  
便照銅斤過關之例辦理恭候

命下臣部通行各關一體遵照可也奉

旨依議

是年十一月初一日戶部奏言山西道監察御史魯贊元奏稱竊查水陸商販輸課抽分一切木竹雜貨及船隻梁頭均有一定稅則其各關則例由部校頒勒爲成式俾收與納不得以意爲重輕猶恐吏商交涉奸欺易生又給以循環親填各印簿親填商本若干納稅若干令商人親手填註使吏胥無由操縱而因以杜征多報少之弊一年屆滿繳還原簿部科磨勘以稽情僞循環簿亦然邇來生齒繁盛商賈增而貨益

流通是以各關取入歲有盈餘惟是收稅成法間有更易卽如親填簿一項不盡商人填註所上稅銀概由吏胥登記名爲流水簿流水簿記定始膳入親填簿輾轉兌那商無由知伏思簿名親填乃由吏胥手錄是以察弊之法資作奸之具改易侵漏何所不可其過往貨上下關猶可互稽若在本地銷售者報稅之後誰從而稽其跳換耶商販多不諳則例所上銀數又不得據實自填始終貿貿是以守關之家人吏役一

氣操縱例外索詐以肥私橐而商本益費商本  
費而物價騰所關於民間利病非小也

臣愚請

令各關口將現定則例刊揭木榜使商民共聞  
共見貨物到關秉公驗定令各商按則上稅親  
填印簿不必責其字畫一律則呈繳部科筆跡  
昭然有無弊端磨勘立見至刊列木榜及收稅  
法平并令各該督撫不時較查勿使吏胥藏奸  
庶索詐不行侵漁漸杜矣等因乾隆三十三年  
十月十三日奉

硃批該部議奏欽此欽遵於本月十四鈔出到部臣等

伏查雍正二年奉

聖諭各省關稅嗣後將應稅貨物則例刊刻木榜務令  
豎立街市使人共見不得藏匿屋內或用他紙掩蓋  
以便高下其手任意苛索欽此又雍正七年奉

聖諭各關例有部頒號簿以便稽查茲聞各關另設私  
簿征收惟於報部之時始將號簿挨日填造其意以  
據實填簿則不能逐日有征收之數目恐干駁查是  
以設法勻派填造如此則簿內全非實在數目號簿

亦爲虛設矣嗣後各關於部頒號簿務須據實填寫不得仍蹈前轍欽此又乾隆七年奉

聖諭近聞各關司權人役巧立名色重戕征收勒捐需索弊端百出大爲行旅之害嗣後各該督撫嚴行覈察遇有此等弊端立即嚴拏重究如司權官員瞻徇袒護亦卽據實奏聞不得視爲具文倘朕再有所聞或被科道知有實據參奏朕惟該督撫是問欽此欽遵均經臣部通行在案今據山西道監察御史魯贊元奏稱各關收稅親填簿不盡商人填註所上

稅銀概由吏胥登記商販多不諳則例所上銀數又不得據實自填始終貿貿請令各關口將現定稅則刊揭木榜使商民共聞共見貨物到關令該商上稅親填并令各該督撫不時較查木榜平法等語臣等伏思各關刊揭木榜臚列應征稅則俾商民通曉併設立印簿逐日令商按則輸稅卽據實親填如有遺漏不令親填者將收稅官參處定例綦嚴且屢經欽奉

聖諭訓飭整頓尤爲諄切詳明是該御史所奏木榜親

填簿二項均經著有成規遵行已久司權之員果能實心經理則吏胥自不敢售其奸僞愚弄商民如其陽奉陰違潛滋弊竇咎在奉行之不力並非立法之未周自毋庸另行置議至各關稅務督撫原有密防嚴查之責果有越例苛征及重戕浮收等弊耳目甚近何難立即糾參卽科道訪聞確切亦可指實參奏若但懸擬其弊竇請加整頓不過付之具文一加飭行而已究與裕課恤商之道毫無實效況木榜平法親填

簿等項在督撫政務殷繁豈能數數自往查勘  
不過委之屬員仍屬有名無實臣等愚見凡關  
權所在均有地方官員一切情弊見聞最易應  
責令本省督撫嚴行體察一有違例私征等弊  
卽行參究則權務未有不肅清者至於考較細  
務如平法之類事涉瑣屑旣非政體亦無實際  
應毋庸議可也等因奉

旨依議

乾隆四十九年奉

聖諭留京辦事王大臣議覆福康安舒常等籌酌粵省洋行事宜一摺內稱洋貨內珍珠寶石等項抽稅易於偷漏應令新任監督等悉心籌酌以期永久無弊等語國家撫御外洋不貴異物每歲番民與內地洋行交易貨物均沾利益原所以體恤夷商至洋貨內珍珠寶石等項並無需用之處向來粵海關抽稅亦屬無多況此等物件本難定價易至居奇且便於攜帶藏匿難保無偷漏分肥否則過於吹求若設法嚴禁逐項搜查實屬不成事體現在京師及各處關隘商

稅則例內本無此項稅課不如聽商人等自行交易免其收稅則諸弊悉清更毋庸多爲防範嗣後粵海關珍珠寶石概不准征收稅課著爲令

乾隆元年兵部尙書甘汝來奏言竊查商賈通有無以便民司市貢貨賄以足賦故關津有過路之稅鎮集有落地之稅酌其所獲利息之多寡不過什取其一以充賦課下不病商上可益國由來久矣自有司奉行不善往往浮收過取而贏餘之數以出近日則視贏餘多寡爲議敘是

以監督有司悉力苛索多方取盈甚則不問則  
例有無定額總籍口於贏餘無出而誅求不已  
毫髮無遺嗟茲商旅何堪剝削況其病不獨在  
商也商增一分之稅卽貨長一分之價而民受  
一分之害是所謂贏餘者非富商之資本實窮  
民之脂膏也我

皇上愛惜黎元德洋恩溥於田房契紙一項已荷革除  
深爲民便臣竊以爲商賈一項亦可準此意而  
畧爲釐定謹將臣耳目所及不便於商民者敬

陳之

一權稅不宜重複也查一省之內每有設關數處者原因各有出入要口不得不層層稽查非爲已稅者越數百里而復征也乃浙江兩廣等處節節皆關一關甫權一關又征此甚非立關之本意實奉行之不善也請嗣後凡貨物經過如初關已稅卽給票爲信他關祇驗票放行毋得重征苛勒

一米穀之稅應豁免也查食爲民天非他貨可

比各省原無米穀稅例惟廣西各關獨征之故  
廣東獨受米穀昂貴之害其餘夔關淮關等處  
雖不征米穀之稅但俱照船隻尺寸則例抽報  
科稅亦仍是米穀征稅也夫米爲窮民所必需  
之物土窄人稠之地或偶有水旱之鄉皆仰資  
於鄰省苟增一關之稅銀卽長一層之米價曷  
若蠲此毫末之稅項而令小民受飽飫之實惠  
乎請嗣後凡米穀船到關止稽查有無夾帶私  
鹽違禁等物概停其征收稅銀船料則小民沾

無窮之實惠矣

一沿海捕魚船隻不應輸餉也查邊海之地遍處汪洋居民惟有採捕魚蝦藉以活命其船則用單桅不能出洋貿易向例祇在於本縣給照稽其出入並不輸稅近聞各海關監督雖單桅船隻亦令請領關牌同雙桅出海貿易之船一體輸鈔此無論輸鈔之多寡卽請領關牌一次已需規例四五六兩嗟此窮漁奚能堪此請

敕令海疆督撫查明單桅魚船概免領牌輸餉庶濱海

貧民得有生計不至困迫爲盜則官與商民又  
胥享安靜之福矣

一魚簍鴨埠之稅宜盡蠲也凡近海居民資生  
爲業有用竹簍取魚者有於埠頭養鴨者閩廣  
之間悉按簍按埠征稅而窮民之生計益蹙矣  
此項稅銀無多原無裨於

國計而極有害於貧民應請盡蠲除以甦民累

一各關之飯錢宜革也商旅到關未問正稅先  
索飯錢嘗見貨物無多之客商其所費飯錢竟

有數倍於正稅者請

敕令各省督撫及各關監督務嚴飭胥役凡商旅到關  
止按則例征收正稅概不許需索飯錢如再有  
不法之徒剝削商民督撫監督置若罔聞者許  
科道不時糾參嚴加議處以上數條皆臣見聞  
所及灼知其甚有病商民故敢不避煩瑣冒昧  
瀆陳是否可採伏乞

睿鑒施行

嘉慶十一年監督阿克當阿咨會總督吳熊光

稱查乾隆五十一年六十等年因粵東米價昂貴  
均有諭商傳諭夷商情願載米來粵發賣免其  
征鈔之案查澳門黃埔二處夷船均有採買洋  
米今酌議如有夷人情願載米來粵進泊黃埔  
者果係專載米石並無別項貨物准免丈量輸  
鈔仍令空船出口其進泊澳門米船亦須查無  
夾帶進口貨物始免完納鈔銀仍准其裝貨出  
口如進口時帶有貨物及黃埔米船進口帶有  
些須貨物均不得免輸船鈔如此分別辦理庶

於民食餉課兩無違碍相應咨會查照

道光四年總督阮元奏言溯查乾隆五十一年  
六十年嘉慶十一年屢有近粵港脚等國粗貨  
夷船載運洋米來粵發賣之事定例夷船進口  
應丈量船身大小報征船鈔粵海關向無米稅  
從前洋米來粵並免丈輪船鈔以示招徠祇於  
糴竣後放空回國不准裝貨出口以示區別此  
係向來辦理章程近年以來洋米罕到詢之洋  
商據稱外夷運米遠來雖免完納船鈔而放空

回國遠涉重洋並無壓艙回貨抵禦風浪該夷等既憚風濤之險又無多利可圖是以罕願載運合無仰懇

恩准令各國夷船如有專運米石來粵並無夾帶別項貨物者進口時照舊免其丈輪船鈔所運米穀由洋商報明起貯洋行按照市價糴賣糴竣准其原船裝載貨物出口與別項夷船一體照例征收貨稅彙冊報部

臣謹會同巡撫陳中孚

監督七十四具奏奉

上諭阮元等奏請定洋米易貨之例一摺廣東粵海關向准洋米進口糶賣免輸船鈔糶竣回國不准裝載貨物近年以來該夷等因回空時無貨壓艙難禦風濤且無多利可圖是以米船來粵者少自應將成例量爲變通著照所請嗣後各國夷船來粵如有專運米石並無夾帶別項貨物者進口時照舊免其丈輪船鈔所運米穀由洋商報明起貯糶賣糶竣准其原船裝載貨物出口與別項夷船一體征收稅課彙冊報部以示體恤

道光十年三月總督李鴻賓會奏言竊臣於道

光九年十月因嘆咭喇夷船延不進口將曉諭

防備及該夷人稟懇減輸規銀各緣由會同臣

盧坤附片密奏欽奉

上諭該夷人稟內夷船規銀不論船隻大小一律征收懇請分別納餉等款尙可量爲變通著該督等

妥議具奏等因欽此臣等遵查各國夷船來粵向

照西洋船例分三等征鈔康熙二十四年定爲酌減二分嗣奉部行西洋船照東洋船例則酌

減等因粵海關歷辦稅務係將夷船分爲一二三等均照東洋船例減鈔銀十分之二按船征收丈量各船時樑頭長濶丈尺將應征銀數遞增遞減凡一等大船征鈔自一千一百餘兩至二千一二百兩不等二三等中小船征鈔八百餘兩至四百餘兩不等此粵海關分別等次征收洋船正鈔之舊例也其貨物稅銀則分貨之精粗計以斤兩丈尺照則輸納又於船鈔貨稅之外另有進口規銀不分等次一律完納從前

原屬官吏丁役人等私收入已以作費用迨雍正四年後經管關巡撫臣楊文乾等節次報出歸公遂刊入例冊每船額收進口規銀一千一百二十五兩九錢六分九折扣算隨同正稅解部歷久遵行無異今該夷等以進口規銀呈懇減納奏奉

諭旨准予量爲變通實屬

恩施格外自應仰體

聖主周恤遠人至意酌量覈減以示懷柔臣等悉心

會議夷船進口規銀係於船鈔貨稅之外另有此項以從前官吏所收之使費改爲歸公銀兩原屬與正餉稍有不同自可隨時斟酌俾更樂於輸將通盤合計不獨二三等船規銀過於正鈔必須予以輕減卽以一等大船而論各國情形不同亦不可不詳加體察臣等再三查覈每年來粵貿易如咪喇嚀國或三十餘船暨二十餘船十餘船不等其一等船不過十之一二二三等船則居十之八九又港脚或三十餘船及

二十餘船不等其一等船則居十之五六二三等船不過十之三四荷蘭噶喇吧等國來船不過三五隻亦係大船少而小船多惟暎咭喇國連年夷船到粵二十餘隻全屬一等大船並無二三等船隻若一等船不許酌減則二三等船多之國按船減銀獨沾厚惠一等船多之國所減甚微甚至無船可減未免向隅似於

聖朝一視同仁之道亦有未協應請嗣後各國夷船進口規銀仿照康熙二十四年酌減洋船鈔銀

二分之例將一二三等各船規銀均減去十分之二以昭公溥如此斟酌變通庶各國大小洋船一體仰沐

皇仁同沾渥澤矣至黃船另有出口規銀五百餘兩九折征收爲數較少亦係隨餉解部放關銀一百三十餘兩係撥充普濟堂公用報部覈銷俱應毋庸議減奉

旨俞允

道光十三年奉

上諭盧坤奏籌裕災區民食請動項採運米石並官  
運商販均照例免稅一摺本年廣東省城被水災  
區糧價昂貴現經酌動倉穀碾米平糶民食仍虞  
缺乏必應預爲經畫招徠販運以資接濟據該督  
體察情形請就近動項採買招商販運著照所請  
准其於廣西省梧州潯州等府酌借庫銀採買米  
四五萬石一面遴派委員前往領運俟陸續買有  
成數先行回運災區濟糶並招商由官給票分投  
前往販運一面於該省藩庫米耗盈餘項內酌動

銀五萬兩發交洋商承辦購運洋米減價出糶仍將糶錢易銀循環轉運俟市價平減再行停止所有借動庫貯銀兩合計糶折及運脚等項另行籌補足數歸款其借動廣西府庫銀兩卽就近作正開銷統歸廣東藩庫分別存貯報撥及歸還原款以省沿途寄解至採運米石係赴災地出糶毋論官運商販經過關津均著照例免其納稅以廣招徠而裕民食餘著照所議辦理

右事例

粵海關志卷八終